

國

朝

文

錄

白鶴堂文錄引

予選國朝古文粗竟而心終未慊以其所得者皆三江兩浙及
閩楚之秀天下之大百餘年之久必有卓然自爲於荒江窮谷之
中而未行於世者因作書詢之龍泉縣尹楊蓉渚先生以先生蜀
人而遊於滇最久也先生乃以滇劉寄庵蜀彭樂齋兩先生集應
予夜讀樂齋集竟躍然曰此真參之太史以著其潔者太史公之
孫唐柳子厚知之宋歐陽公有之明歸震川實允蹈之入
本朝來自魏叔子外未之敢許乃今得之於樂齋大畧其人眼高
於頂力大於身讀書能提要鉤元行文則擺脫一切浩浩落落絕

國朝文選
無渣滓視人世泛濫之文如以朝衣朝冠坐於塗炭觀其以白鶴
名堂可知其用意之所在矣集中傳最佳議論之文未能奧衍要
之可當一潔字樂齋名端淑眉之丹稜人雍正乾隆間以進士官
吏部與胡稚威蔡芳三相往來文中文末多二君評語云上高李
祖陶撰

白鶴堂文錄目錄

贈懷遠將軍玉吾公家傳

石哈生宋石芝傳

張文端公傳

榮祿大夫滿江王公傳

陳烈女傳

廖氏傳

唐子酉先生文集序

送弟向若序

冷吟居士詩序

鎮遠蔡侯碑記

萃龍山記

劉宜人墓誌銘

奉政大夫蔡君墓誌銘

爲學一首示子姪

蜀碧後序

雜說二

白鶴堂文錄

丹稜彭端淑樂齋著

後學上高李祖陶欽

高安葛為霖雨

○○贈懷遠將軍玉吾公家傳

余祖先將軍諱萬崑號玉吾生九歲而孤弟諱萬嵩甫六歲遭伯氏變貧無以爲資然慷慨有大志常以濟困扶危爲己任歲旱貸粟於鄰人朱翁翁善鑑奇之歎曰逆臣擅權盜賊橫溢世將亂能障此方者必君也請以子孫託遂指粟數困遺之後壯力治生事有田百頃家僮數十人甲申之變逆賊張獻忠由夔及重瀘破成

都據藩府僭偽號大順土賊竊起眉有鐵腳板丹有蕭永道先將
軍團鄉勇力爲防衛盜不敢近獻逆遣假子撫南王劉文秀屠川
南始印蒲次及丹營丹城外先將軍計歛賊且覘動靜於是擇健
勇七人與俱內裹綿甲藏利刀牽牛擔酒至賊營賊橫戈豎矛刀
劍交加光寒射目從人俯首次進股慄失色先將軍意氣自若賊
詰來意語未畢忽從人藏刀墜地鏗然有聲賊叱縛帳下詰以故
從人畏賊舌強強不能下先將軍從傍應曰某等去將軍營數十
里防路盜劫藏刀自衛無他意也且某等僅八人計何能爲賊釋
之遂歸暗據扼要備賊賊亦旋引去當是時丹東南北諸邨殘害

幾盡獨吾鄉安堵如故。邑之避賊者多依焉。獻逆之據成都也。悉將楚蜀所掠金載船數百。欲順流下嘉陽。明參將楊展起兵大破賊於眉之江口。焚其船。其金盡沒江中。賊逃遁。先是川北土賊姚黃黨袁韜武大定。聞展舉事。往投展。展愛其勇。倚爲腹心。及賊敗。韜屯青神。大定屯犍爲。展屯嘉陽。兵勢甚壯。然展名方盛。負其才。藐視韜與大定。兩人陽附展。而陰實忌之。常有圖展志。適展壽日。密謀置酒。殺之。遂圍展宅。展子景新率從騎三百自黎雅奔過鐵鎖橋。三百騎悉沒橋下。景新勢窮。乃趨先將軍甫。設食而韜眾已駐余家五里外矣。景新遑遽失箸。泣語先將軍曰。願就縛。毋以我

累君先將軍曰事急矣公子第行擇駿馬令由間道越蒲卬以奔
成都。囑之曰賊追必急此行三百里惟新津長江可以阻賊公子
渡江當沈船毋使得渡吾自有計以退賊因率鄉老數輩俯迎道
傍以實告韜等熟視之不疑也問去幾何矣曰未踰時何道可及
曰閒道近大道較易行韜從大道故令導者紆其途景新甫渡江
卽沈船殺渡夫韜至津急不得渡而景新已脫去楊氏之不絕者
先將軍力也我朝大軍旣誅賊於鳳凰山下餘孽未息其黨
赫成裔復據黎雅叛建南觀察使張能鱗聞風負卬以逃賊乘勢
由青衣江破洪雅夾江直下嘉陽川南復大亂警報至成都制軍

李公國英憂之問軍中誰能探賊虛實者或以丹稜界連黎雅舉先將軍與張公應試對應試者予家世戚爲人有幹略曾與先將軍相約拒賊者也召至詢之先將軍曰某聞師出有兩道一出卬州一出洪雅洪雅地僻而徑險賊不知備將軍大軍揚言出卬而以奇兵襲之可以破賊且傳言賊喜僧此亦易計耳遂解歸遣幹僕削髮易衣乞食賊營潛探路徑還報制軍於是制軍分兵兩道寇期暗應及期使前軍挑戰佯敗賊悉眾來馳奇軍突入豎旗鳴鼓縱火焚其巢火燄臨天賊回顧驚亂夾擊之斬赫成裔眾悉降制軍語先將軍曰微君之功不及此給以都督僉事劄付張如之

先將軍堅辭制軍不能屈。張宦數年亦歸。先將軍平生濟人利物。他無所計。當蜀遭賊變。人人逃竄。不暇耕。會大旱。斗米數千錢。人不得食。道路死者相枕藉。先將軍家有餘蓄。設粥場於通衢之傍。四方就食者日不暇給。復擇膏腴地種芋及黍稗。可食之物。以續之。三年所活數千人。鄉官裔陳道儲少孤。諸奴乘亂謀逆。先將軍撫爲己子。誨之成。給以業。後卒爲所陷。幾覆其家事。自終不與較。是二事者。父老至今百年來。猶歎息稱說之。年八十八卒。以孫肇洙贈承德郎。孫端淑贈奉政大夫。孫端節贈懷遠將軍。臨危囑子孫曰。余不幸少孤。履險涉危四十餘年。賴先人澤至今。吾無德以

及子孫惟忠惟孝。克勤克儉。毋蓄舊怨。而侮鰥寡。各守厥訓。以啓
後人。卒之日。遠近聞之多爲流涕云。

迨敘先人功德。只如莽莽直敘。而無限可驚可愕。可泣可歌之
事。皆盤結於字裏行間。真文卽至文也。原評

石哈生宋石芝傳

石哈生者或曰秦人或曰蜀人長七尺餘力能扛鼎無妻子生業

自鬻於西安某家供芻米薪水之役惟謹無大小皆喜之居嘗寡

言笑無喜愠色人莫測其爲何人詢之不言問其名亦不告因共

呼爲哈生哈生者諺所謂無能而虛生也獨與富平人宋石芝善

石芝嘗游滇南察吳三桂必叛因潛匿及三桂之叛也我

湖遣大將軍高善貝勒及將軍班第討之與賊相拒於滇之石萬

溪其山二面險峻獨一面稍平賊據之期年不能克朝廷復遣

將張勇助之勇兵西北人滇路崎嶇值霖雨多疲敝扶杖而行既

○宋○有○事○述○石○無○事○從○石○較○起○得○法○開○口○數○語○便○寫○得○暢○快○不○

測

以下詳敘石芝

至○旗○兵○見○之○鼓○掌○笑○曰○是○尚○能○殺○賊○耶○號○其○軍○曰○張○娘○子○軍○於○是○
石○芝○黃○冠○道○服○詣○勇○轅○門○軍○校○疑○爲○賊○諜○拘○以○見○勇○石○芝○長○揖○不○
拜○勇○詰○之○曰○某○與○將○軍○同○里○聞○將○軍○善○將○略○兼○下○士○特○爲○百○萬○生○
民○塗○炭○而○來○獻○破○石○萬○谿○之○策○勇○奇○之○以○禮○見○屏○人○語○曰○策○將○安○
出○石○芝○曰○賊○所○恃○者○石○萬○谿○也○彼○負○險○以○抗○必○將○深○老○吾○師○須○其○
敵○也○然○後○擊○之○故○爲○將○軍○計○利○在○速○戰○速○戰○而○取○勝○非○用○奇○不○可○
勇○曰○用○奇○奈○何○石○芝○曰○此○山○東○南○隅○有○閃○道○險○阻○無○備○可○通○人○旗○
軍○攻○其○前○將○軍○以○銳○卒○襲○其○後○樹○旗○鳴○鼓○令○軍○士○齊○聲○大○呼○曰○大○
兵○已○據○此○山○矣○賊○眾○聞○之○必○驚○怖○散○亂○破○之○如○振○槁○耳○此○固○將○軍○

平賊第一勳也。勇善其計。次日大將軍督戰。勇托病使副將將其軍以行。而潛引三百銳卒從間道步行。沿嶺攀葛而上。悉如計賊。兵果亂。遂破石萬。勇以爲能。留軍中參議。其後平定諸藩。多出石芝策。嘗閒居與勇語。曰。某平生少知己。勇曰。如某者不足爲公知己。耶。曰。某與將軍一言偶合。非知己也。所稱知己。獨石哈生而已。及歸西安。每訪哈生於其家。必攜酒從。後戶入相見。偕至僻地。跌坐飲酒。劇談談罷。大笑笑罷。復大哭。盡棄其飲器而散。又常於將軍幕中大會賓客。設席虛左。或問之曰。此待吾友人石哈生也。俄而哈生草冠草履。衣昂然而入。揖眾直踞其席。石芝旁待。

執壺傾酒甚恭。哈生亦不稍遜。持杯藥飲。傍若無眾。賓客也。眾大驚駭。卒莫測其爲何人。後哈生病篤。其主人將爲殮殮之。具哈生日。待吾友人宋公備之。主人憂其不及。有頃石芝果至。哈生張目視之。不發一言。遂卒。石芝爲痛哭。竟日。悉出囊中資厚葬。成禮而去。天下旣定。將軍勇欲表薦石芝於朝。謝之。贈以金。亦不受。遂隱於華山。云。彭子曰。余嘗與張將軍孫宗純者遊。爲言石宋兩人事甚悉。宋石芝一出。而爲張將軍畫策。建奇勳。功成身隱。哈生見重於宋。其才智必有大過人者。乃爲人奴而不辱。彼其中固有不可測者耶。宗純又云。哈生旣沒。或傳其善天文。本故明宗室子。以石

爲姓有託焉爾間之不言故世莫能定要之此兩人亦奇矣哉

精於史記合傳之法而神韻復超

萬字光

○張文端公傳

公姓張氏諱鵬翮字運青諡曰文端蜀遂寧人也父光祿公某夢祥雲繞室覺而生公幼端靜如成人有大志嘗讀陸宣公奏議至貨賄之際云云慨然歎曰伊尹一介不取孔明澹泊明志先聖後聖其揆一也康熙己酉舉於鄉明年成進士入翰林時館中競以文藝相餉公年最少獨與魏環溪諸公講學不倦癸丑改刑部主事尋遷員外郎嘗辨疑獄不避權貴人皆憚之再遷禮部郎中上召見賜太液鮮鯉以卽官邀殊恩自公始庚申特簡知蘇州府事未幾以太夫人憂去服除補兗州甫下車釋冤民三十人全婚

姻一人因舉者屢遷兵部督捕右理事時

上方重于公成龍問諸臣中誰敢繼者眾以公應於是命與內大臣同使倭羅斯路經喀爾喀地初額諾德與喀爾喀爲難

上嘗命達賴喇嘛解之至是復交搆喀爾喀聲言王師將援以給敵公聞之言於眾曰古人有言慮善以動此行適中額諾德之忌當預計之毋使生變眾迂其議俄而額諾德果執我前軍眾驚欲退公急止之曰不可受天子命當奮不顧身奈何示小醜怯且吾退而彼襲其後將何以禦莫若陳師固壘以張之而徐遣一介以通其故彼若跋扈再計可也眾猶豫公厲聲曰事出危難正臣

子捐軀効命之日。公等皆怯。某獨當之。眾不敢拂。於是從公前計。額諾德服罪。使還轉左理事。再遷大理寺少卿。已已。扈從南巡。還至吳門。授浙江巡撫。公之撫浙也。約已率下。與利別弊。旌奇節。安流徙。七年。士敦實行。人息競爭。會請免捐穀。時議欲中傷。奏上。仍畱任。尋遷兵部侍郎。浙民感公德。攀轅涕泣。繪其像於竹閣。曰。傳以念我公之惠政。已而旋召督江南學政。三年。上嘉其操。賜書獎諭曰。從前作清官者。宋文清一人。近日張某堪與之匹。遂遷都察院左都御史。會淮黃泛溢。南北阻絕。運道難通。議者欲改海運。上特調公總河。命經理其事。公博考輿圖。徧考故迹。于河自

開歸至雲梯以下于淮自洪湖溯盱泗以上按審形勢歎曰河性
本直而壅曲之是拂其性也河流入海而隘其口是阻之流也昔
之淮南高而北下今之淮南亢而東傾而以數竇爲之牽引欲其
還向清口不亦難乎欲疏河必開海口欲清河必塞六壩海口不
開啓之果腹而尾閭不暢也六壩不塞譬之危漏而中無蓄停也
乃陳十策願以便宜行事 上報曰可於是擇人任使遵王景塞
館陶之法修明潘季馴江一麟所築歸仁堤之遺拆攔黃壩杜諸
決口倍大河南北之隄曲者使直而河水朝宗堵唐梗六壩開張
福口裴家場瀾泥淺三汊儲及張帥諸莊挽全湖之水併力敵黃

而○清○淮○以○出○是○役○凡○耗○帑○數○百○萬○有○奇○公○不○以○錢○利○已○故○下○亦○贖○
激○輸○枕○樂○爲○之○用○當○是○時○水○安○其○道○民○寧○其○居○舟○行○不○驚○淮○運○乃○
濟○時○人○爲○之○語○曰○昔○之○帑○肥○於○人○今○之○帑○肥○於○地○美○公○潔○也○其○居○
民○爲○之○謠○曰○塘○梗○築○兮○水○不○通○白○駒○開○兮○下○河○通○海○不○揚○兮○水○不○
湧○民○樂○其○中○兮○人○安○而○歲○豐○頌○公○功○也○先○是○陳○家○莊○外○近○漫○灘○內○
逼○湧○泉○狂○瀾○騰○沸○相○傳○有○水○怪○公○爲○文○祭○之○三○日○有○狀○如○牛○徙○去○
於○是○癸○未○上○南○巡○白○清○口○至○桃○源○周○行○徧○視○河○黃○淮○清○回○視○公○
曰○朕○三○十○年○前○泊○舟○於○此○水○不○覆○隄○者○數○寸○今○安○瀾○若○此○卿○之○功○
也○公○頓○首○謝○曰○此○皆○奉○我○皇○上○經○略○非○臣○力○也○詔○爲○刑○部○尙○書○

尋轉戶部尚書再遷吏部尚書。上嘗以公公直廉明凡有大疑

獄輒遣判之前。噶禮之參陳鵬年也。公直鵬年而曲禮。公子某牧懷寧。屬禮下例得薦。禮語同列曰。吾且殺張家子。姑從民望。寬之。尚望薦乎。公按奸發伏。振摘是非。無所容回。多類此。

世宗卽位九年。拜內閣大學士。上在藩邸。洞悉天下利弊。及中

外臣僚淑慝。初御極。卽有是命。其子某及孫某各賜爵。有差時

上方勵精圖治。毅然更新。公亦以身任天下事。因能授任。持大綱

去煩細。時議稱賢相焉。公自弱冠入仕。及爲相。凡五十餘年。名滿

天下。主上不疑。同官不忌。考諸史冊。往往難之。年七十七卒。遣子

以邊防河防海防三大務遺奏。上悲悼減膳。贈少保諡文端。賻

賜甚厚。公兩知貢舉及同考官。所拔多知名士。三視河當爲相。

上猶遺公曰。以位則卿不當。差以齒則卿亦不當。差然徧視諸臣。

無出卿右者。蓋公長於治河。凡所經畫無不完固。至今數十年來。

遵守其法不變。某丁未試南宮。上以春寒賜天下貢士綿衣。蓋

茶試畢。羣詣闕謝恩。太宗伯吳公襄宣於眾曰。上有旨汝輩他

日作官當如張鵬翮朱軾。方不愧朝廷。其見重如此。贊曰。蘇子有

言。其生有自來。其逝有所爲。聞公初入棘闈。監臨某公夢綠衣白

馬人入某號。以爲奇。使人記其名於簿。試竣按之。公名列焉。祥雲

國朝文錄
燒室之兆洵非誣矣

特重表其治河餘皆從路

○ ○ 榮祿大夫滿江王公傳

公諱允吉號滿江蜀安岳人也先世未有聞人至公始顯少從戎
嘗為某制軍賞擢日夜行六百里不倦制軍喜之拔督標把總未
幾再拔于總會制軍觀兵較場傳令箭道首尾設矢的各一列綵
架於中衢暗置鴉鵠瓦罐中懸其上命將卒初矢次鎗次復矢軍
中無當意者序至公公擣轡而上一矢破的馬縱不能止已越綵
架數武公回身舉鎗碎其罐鴉鵠羣飛一軍齊賀公倚鎗復從容
發矢矢畢以報制軍制軍曰真將材也旋擢瀘定橋守備時蠻人
為亂抄劫商賈道路不行公申其狀於制軍遣提督唐某領兵勦

之命公爲前鋒公初與蠻人戰失利唐將斬之同官守備李琳者以其家十數口保公曰王某騎將也將軍令再戰不克琳願與俱戮唐限三日破賊飭曰若失機持汝頭來當是時蠻人旣勝橫據大岡壘木石於上堅不可破公潛命熟蠻探其形勢回報曰大岡三面險峻獨後面稍平悉深箐公曰吾知所以破賊矣於是揀營中健卒五百人餉以牛酒令其醉飽約曰吾與公輩願生乎願死乎衆曰何謂也公曰三日能破賊則生不能破賊則死衆曰惟公是命於是括諸營羊數百頭以火縛角上夜半令老弱軍驅至大岡下用巨炮飛擊箐以鉦鼓示欲上狀蠻人猝驚不悟其誘也羣

譚○曰○官○兵○至○矣○盡○木○石○下○墜○公○潛○與○五○百○人○閒○行○從○深○箐○中○攀○藤○附○葛○而○上○排○刃○突○擊○火○其○巢○蠻○大○亂○爭○竄○不○及○凡○斬○首○千○餘○級○生○擒○數○百○人○報○至○唐○驚○曰○遂○能○破○大○岡○耶○列○戰○功○第○一○提○督○唐○惡○蠻○人○叛○欲○示○以○威○設○營○郊○外○縛○所○擒○蠻○眾○數○十○人○跪○列○左○右○命○公○斬○之○公○立○刃○數○十○人○而○色○不○變○觀○者○咸○欽○其○勇○蠻○平○擢○督○標○遊○擊○再○遷○參○將○數○年○升○秩○洞○庭○湖○副○將○又○數○年○升○秩○川○北○鎮○總○兵○會○西○藏○之○變○制○軍○年○請○命○岳○公○鍾○琪○將○兵○公○副○之○藏○中○素○聞○公○名○曰○是○昔○年○能○取○大○岡○者○公○至○藏○營○伍○整○肅○刁○斗○森○嚴○一○夜○賊○窺○營○營○驚○公○下○令○靜○鎮○毋○噪○賊○旋○遁○因○問○司○夜○爲○誰○或○以○公○子○某○應○公○命○斬○之○

於是營中諸將卒齊赴轅門請免。公曰：軍令如山，不可移。若徇吾子，何以服眾？○與○成○雖○先○斬○其○兵○子○相○類遂斬之。軍中股慄無敢犯者。是役也，制軍區盡得宜。自成都去西藏近萬里，不勞一軍，不煩一卒，而糧餉充足，故公輩得從容破敵。二年，西藏平。上召見授鑾儀衛正使，而公年亦已邁矣。未幾以老辭歸。上不拂其意，深慰勞之，賞賜逾常。家居數年卒。卒之日，年七十餘歲。

贊曰：公與余家為世戚，余未獲親炙。公余弟磬泉為余言，狀貌雄偉絕人，舉止嚴肅，不可犯。一飯斗米，一飲百杯，談往事，疊疊不倦。蓋古名將，未有過者。嗚呼！西藏之平，公有奇勳，為當事者所忌，反

見黜李廣不侯可勝慨歎

只著意寫破大剛一節西藏事竟未實敘而軍令如此其概可知

陳烈女傳

彭樂齋曰：余聞諸先儒云：女子未廟見不成婦，無守節理。此言蓋不以其所難強人也。未成婦而矢節，豈非能人之所難哉？郟城陳烈女者，生自農家，許聘鄰人徐姓子。未冠而死，訃至，女執薪方爨，聞之，薪自竈中燃及外，達於手，始解，須臾入內，撤其頭繩，足帶易○所○謂○心○不○在○焉○，以素出，復爨，忽大慟，其嫂見之，微笑言於母。母曰：閨中女，奈何作此態？女遂止。女父農人，難與言。舅某邑諸生，素奇女，適他出，女口中念曰：安得舅氏至乎？久之，乘閒語母曰：兒已許聘徐郎，便終身不易。聞郎伯兄有兩子，得一子輔之，便畢兒願。母正色叱之曰：唉。

是何言。汝母自爲婦來。未聞有此止恐爲外人羞也。且毋令若父
知。知則當重怒汝。女不再言。他日母怪其形骨立。潛視臥處。則淚
溼枕。有血痕。驚曰。此子乃一癡至此。抑倩鄰嫗代解之。女度母終
不可行。已志而不敢達於父。但曰。俟舅至而舅終不至。遂自經。
母也。天只不說人只。
死滿城。老人屈悔翁。曾與女舅遊。得悉其事。言於余。余聞而歎曰。
嗚呼烈矣。豈非能人之所難哉。是固可以愧天下之旣爲人婦而
他適者已。

文家全貴八面烘托。篇中略寫嫂。詳寫母。虛寫舅。只是極寫烈
女耳。若專就正面寫。縱極意描摹。總不生動。

原評

此等題今人作之者多矣然往往有議論而無神味又或過於描畫未能恰如其人惟此文寫其嫂之微笑寫其母之痛訶寫其女之驟聞而神奪久鬱而志堅如燈取影毫髮畢肖而又筆筆高簡無小說家渲染習氣技也而入於神且進於道矣

廖氏傳

廖氏者蜀江津縣民戚成勳婦也。成勳僻居山中。值獻賊變。倉皇奔竄。廖弱不能從。不得已置之去。廖堅閉重門。自誓以死。遲數月。賊不至。倉中積穀頗饒。資以食數年。荆棘叢生。蔽其宅。遂與外隔。其後食漸不繼。向澤池邊種穀。續之以草爲衣。四十餘年。亦不知成勳之存。凶生死矣。成勳竄入黔中。久之別娶。妻生子二人。年六十餘。歸訪舊里。是時天下甫定。川中土滿人稀。田園半沒。深箐虎豹豺狼。出沒縱橫。人跡罕到。無從覓其故居。但識其向而已。因倩人力持斧斤。斫竹伐木。數日望其宅。頽欹尙存。大樹如圍。自屋中

出微煙出沒異之固不計其妻之猶存也及近宅廖初笑愈從樓上呼曰汝輩何人成勳惶怖失色倉卒厲聲答曰吾此宅主人戚成勳也廖窺視久覺衣冠迥異昔時而聲音笑貌彷彿似其夫泣語曰君妾夫耶妾廖氏也可將君身餘衣袴與妾得蔽體相見成勳怪之然聽其言似非無因者卽解衣擲樓上須臾氏自樓下面目黎黑髮亂如蓬成勳恍惚莫辨廖備述其由兼言當日事歷歷夫婦相泣如再世人偕至鄰家復自黔挈其妻子還年各九十餘始卒彭子曰嗟夫獻逆殘蜀古未有若斯之酷者也當是時父子兄弟夫婦間其得全者亦已僅矣廖氏熒熒一婦人獨守窮野荒榛中

與成勳別四十餘年卒偕老死母亦有天幸歟嚮使氏迫於勢一
死無餘世必無有知者事固有奇異不可測若此耶余丹縣南竹
林寺楊氏女與母同居事母孝母死不字入山採黃精食之體輕
能飛往來樹間父老猶及見之後莫知所終其事固與廖氏類歟
此真奇事文亦足以傳之若令蔣清容先生見之可以譜入紅
雪樓傳奇

唐子西先生文集序

余少讀吾邑宋唐子西先生古硯銘及山居詩訪其集二十年不
可得癸亥春余弟仲尹偶獲鈔本於京師肆市中詩文及雜著凡
三十卷所書體製仍從宣和舊式蓋先生之文未行於世久矣宜
構求若斯之難也於是爲之序而梓之敍曰丹稜屬眉山兩宋時
人文之盛莫盛於蜀蜀莫盛於眉天下之以文名者六家而吾眉
得其三若蘇文公洵文忠公軾文定公轍與廬陵臨川南豐互爲
雄長者也以史名者三家而吾邑得其一若李文簡公燾所著長
編與陳水新安相爲表裏者也子西先生以超邁俊逸之才接踵

其間當是時三蘇名方盛先生出稍晚使得遊東坡之門其聲價
豈在晁黃秦張下哉先生既沒世徒慕其詩而不知重其文推之
者獨一陳后山耳乃沈溺五六百年而一旦得於吾弟仲尹之手
毋亦有天幸歟文簡之史闕舊本尙流落吳越楚粵間余不及獲
見使得與先生集並傳是固有幸有不幸歟嗚呼先生官不足以
稱其才而遷謫嶺南聽軻以沒獨其文若精金粹玉不可磨滅奕
世而下猶有同好或亦先生之志也已

標舉處甚有體面筆亦爽潔

送弟向若序

南丹小邑也。自明以來四十年。登賢書者數人。列南宮者一人。而
余家昆季七人。獲其六。自顧何能。亦由先世之德。祐啓後人。而邀
天之靈。以至此也。且夫天於人。何嘗之有。天之將福。是人也。必先
其○在○也○以○小○福○試○之○其○人○而○能○受○則○福○遂○因○之○而○至○矣。天之將禍。是人也。必
先○以○小○禍○懼○之○其○人○而○能○悔○則○禍○遂○因○之○而○息○矣。試以○小○福○而
不○能○受○懼○以○小○禍○而○不○能○悔○此○天○下○之○自○敗○人○也。考前史所載。及
近世見聞。往往不爽。其得福者。必其能受者也。其得禍者。必其不
能悔者也。易曰。天道惡盈而好謙。書曰。驕淫矜誇。將由惡終。嗚呼。

可不凜哉。可不凜哉。

何等高古何等深厚宋人見此理却無此筆

芳三

冷吟居士詩序

余客京師有國朝五言近體之選天下諸名士讀是集者輒趨之謂余可與言詩欲并窺其全因不自度並次諸體大要賤稚而貴老賤俗而貴古賤華靡而貴清與秀是數者人世所指爲冷而避之者也然格不冷不老筆不冷不古骨不冷不秀神不冷不清世之所避吾之所趨也余年家子易君淑南以冷吟居士集遺予予未識居士爲何人也讀其詩而歎曰嗟乎是其格老其筆古其骨秀其神清得冷之味者也淑南曰君曷敘而行之予曰予何以敘居士之詩乎哉夫蘭生於谷梅生於冬二者天下之至冷也而

品○花○者○獨○貴○之○今○天○下○之○品○居○士○詩○者○必○有○在○矣○予○何○以○敘○居○士○
之○詩○乎○哉○

作兩層寫後幅愈簡愈遠神韻獨絕

原註

鎮遠蔡侯碑記

雍正乙卯黔中蠻獠之變呼嘯成羣。蟻擁蟻聚。南鈎牂牁。置魁立帥。搔擾良民。當事者堅壁城門。一籌無措。萬姓驚奔。不知所爲。鎮遠當蠻獠四出之衝。城郭不完。兵甲不備。而危而復安者。邑侯蔡君笠齋保障功也。獠平。鎮遠人屢欲碑其績。蔡君不可已。而以例推陞麻哈牧。閱年餘。郡人思慕不已。遂相約私立碑於鎮之瓦寨及塘頭諸地。後書其銜曰。原任鎮遠縣知縣。今陞麻哈州知州事。蔡諱某。逾月餘。郡人復將碑上銜剗去。郡守趙公聞之。詢故。郡人曰。鎮遠爲獠所困。幾陷矣。賴我蔡侯得以亾恙。全城之功。固莫大

焉。而仍官一州。竊爲不平耳。且是時。與我蔡侯同事。諸人功不必。如蔡侯位。不必出蔡侯上。而一歲。累遷者有之。或貪天之功。以爲。已力甚之。斬刈良獠。誣良爲奸。而置身通顯者。比比也。我輩紀其。績以示不忘。刻其銜。毋使後人知之。謂我蔡侯有大功於民。曾不。獲報而名位之卑。如此郡守不能答。嗟乎。古之循良。所居民樂。所。去民思。勒碑者。眾矣。未有以刻銜聞者。豈草野罔識。愚諱。遂逕行。其直道歟。抑我蔡侯之德。入人肝脾。故不惜以千祿百福。畢致其。人歟。雖然。去年春。

天子方下詔求骨鯁之臣。如陸隴其、陳瓚、召見者五人。蔡君其一。

焉○則○是○蔡○君○之○賢○其○上○官○不○必○知○之○而○則○有○此○耳○天○子○固○已○知○之○也○
天○子○知○之○而○必○用○之○行○將○羽○儀○乎○天○朝○以○爲○邦○國○光○也○奚○翅○一○
州○一○牧○而○已○哉○郡○人○又○何○憤○焉○

不實彼所以全城之功而但就郡民橫憤不平立論脫盡恆蹊

○萃龍山記

○丹○之○山○自○瓦○屋○而○來○袤○延○數○百○里○為○總○岡○或○曰○總○諸○山○之○岡○也○自○
○總○岡○而○來○袤○延○數○十○里○為○盤○陀○盤○陀○之○山○峯○多○而○秀○石○大○而○奇○蓋○
○丹○山○之○勝○於○是○始○其○自○盤○陀○折○而○東○也○則○接○赤○崖○龍○鶴○飄○然○諸○山○
○以○達○於○眉○而○其○支○分○而○南○也○則○蜿○蟠○扶○輿○至○萃○龍○山○而○勢○一○聚○其○
○山○巋○然○特○峙○其○旁○兩○峯○橫○插○每○於○晴○日○登○之○萬○山○環○拱○殊○壯○極○觀○
○瓦○屋○峨○眉○俱○隱○隱○如○伏○淑○嘗○考○丹○之○輿○圖○惟○載○赤○崖○龍○鶴○飄○然○諸○
○山○而○茲○山○與○盤○陀○不○載○乃○丹○之○人○尙○知○有○盤○陀○不○知○有○萃○龍○而○萃○
○龍○之○勝○又○不○減○諸○山○竟○未○得○附○之○以○傳○則○夫○世○之○靈○區○輿○境○其○理○

沒於荒裔僻壤而不得傳如翠龍者皆可慨也。山故未有名。山之
有名自余祖先將軍王吾公建寺始也。先將軍嘗爲簡州判官。遇
僧海智異之。偕與歸。因卜居茲山之上。旣而鋤茅誅棘鑿山之半
建寺數椽。工竣請名其山於馮江王公。宣子先生曰。可名翠
龍山。蓋取荀氏入龍義也。并名其寺曰紫雲寺。以山之上時有雲
氣出沒故也。康熙己亥歲。予小子淑讀書於上。旣賴先人澤得優
游。以卒業。又恐傳之久而或沒其由也。故記之。使異日或得與赤
崖龍鶴飄然詣山並傳也已。

起一段最擅勝場。今予錄其文而此山傳矣。

○ 劉宜人墓誌銘

古州司馬蔡君力齋之配劉宜人、似、是、帝、語、實、卽、一、腐、之、脈、先其姑前一月卒訃至京師其弟太史雪南述其行略請銘於余曰嗚呼吾嫂平生篤於孝、○ 提、曉大義適吾兄三十年、○ 孝、母無懈容、曩母疾篤屢易醫者皆難之、嫂焚香夜祝願以身代、既而潛割股以進始愈、一婢竊見之、嫂故弗洩也、當吾兄官黔之鎮遠、兩迎養、嫂未嘗不從、雍正十三年、逆苗爲變、鎮兵出援他州、苗以數萬眾突至、吾兄方力謀守禦策、而署中胥役紛紛奔竄、獨幕友張州九徘徊不去、兄曰事急矣、速去、諸州九曰吾非不卽去、特爲君老母故耳、今虜環於郊、君以空城獨當

其任奈何使老母坐困不測之地乎。吾與君分則賓主情同骨肉。君母卽吾母。吾思避難沅州。欲為君奉老母行也。雖然服食起居。微君夫人無與左右。况君有四月嬰兒。聞老母最係念。惟君籌之。嫂時竊聽屏間。倉遽出曰。先生言甚當。顧今日之事。尙有重於此者。願遠危若朝露。固臣子盡職之時。吾義當從夫。不應獨全。先生奉姑行。幼子存。匹所不敢言。吾兄正色言曰。是何言。從姑義也。從夫亦義也。今日之事。從姑為重。且汝既從姑。毋使吾以老母縈心。或得從容畫計。倖保無虞。是汝於義兩得也。嫂顧泣奉姑行。當是時。吾母新驚於亂。又以吾兄故。憂怖彌深。嫂奉事益勤。日則斂情。

唯大義

妙在一折

唯大義

慰姑夜則咽哽達旦體素羸以哀傷故乳竭不給幼子天焉卒之
使吾母得由黔楚以歸蜀者嫂之力也此其卓卓大者君吾戚也
故告之余固素聞宜人多懿範今益信嗚呼其可銘也已宜人子
二張某妻某氏次某聘吾兄又仙之張女女幾許字某享年幾今
將葬於某山之陽云銘曰生既從姑於患難兮履至險而能平沒
復從姑於九原兮距後先之一旬嗚呼宜人以孝死兮夫何憾於
此生

只就雪南口中敘述二事前段簡而該後段詳而盡簡處不得
增一字詳處不得刪一字此兩段外亦不必復贅一語於此可

以識史體原野

目錄

三

○ ○ 奉政大夫蔡君墓誌銘

○ ○ 奉政大夫古州司馬蔡君卒。余聞之，爲位以哭。悲吾友之位，不稱其功而壽不酬其德也。其弟太史雪南走書數千里，囑余銘。嗚呼！微雪南言，固將有以銘吾友也。因敘以銘。敘曰：公諱時，豫字立齋。先世自越遷蜀。父懷遠將軍某公，歷仕山東，遊擊卒於官。公時年十二。弟雪南方在抱，奉母夫人扶柩歸里，閉戶讀書十餘年。弟兄先後以文名蜀，舉於鄉。兩試南宮，不第。揀令黔中，以能調鎮遠鎮。遠者，苗民雜處邑也。夙苦凶悍難治。公爲政精明果決，事至能斷。復以德化人。治行稱黔中第一。會時議改土歸流，請苗聞風思逆。

公悉其狀。上書巡撫某曰：大羊之性，不可以恩諭也。不備將爲害。凡再上而撫且怒，飛檄罪公。苗則果反。當是時，提督駱元生悉徵黔中數鎮兵萬餘拒苗於羊老。公聞之，致書元生曰：兵家喜壯惡老。地名羊老，非駐兵地也。某觀鎮遠上控偏橋，下扼清溪，實據諸苗之要。將軍移兵於此，從中調度，俾楚蜀諸軍得以進援，乃萬全之策。若鎮遠一失，苗人入而將軍何以禦之？不從。未幾，黃平諸州縣果罹害。苗人乘勢遂圍鎮遠。鎮遠之兵已危極。馬羊老矣。時公新遇清江別駕，未及赴。諸同官倉皇失措，思欲逃。公阻以大義曰：君等皆夫。城誰與守？眾曰：能戰乎？能守乎？公曰：戰則不敵，以計先之可。

守也。眾不得已從公。於是公悉棄倉實以安流民。募士卒數百與
誓括商賈布得萬疋。設軍帳數百環城。示以不測。令士卒執戈迭
繞城垣。暗發礮矢傷苗。苗驚疑不敢進。遂遣公親環甲冑樹旗鳴
鼓。率眾追躡其後。苗人奔逃無敢有復窺鎮遠者。公既保鎮遠。與
提督哈共相聲援。乃得合楚蜀諸軍次第平苗。當是時名滿黔中。
黔之人無老少知有公。不知有上官也。上官忌之。同官乘隙交搆
之。無功而冒上賞者。纍纍獨公厄抑不得進。嗟乎。歐未嘗教之卒。
臨不可守之城。以戰虎狼百萬之賊。此王介甫所以深歎息於丁
元珍者。而公卒以成功。其賢於元珍不已遠哉。其後由清江別駕

遷麻哈牧數年始得遷古州司馬以母老乞養上官不許會緣例入覲陳情請改近地命下遂飄然歸養數月丁母夫人憂明年公卒卒之日年五十有二初

上遣張文敏公照經略黔中文敏與公語奇其才謂可大用欲薦公未幾以事逮獄遂寢又有以陽城馬周薦公者亦不果用卒以司馬終豈非命也夫公事母夫人以孝聞弟雪南幼病醫者以藥進艱於飲公取飲示之其至性過人如此又善文章所著有集若干卷皆足傳於世夫人劉先公卒生二男子曰某聘吾兄端洪之長女曰某聘某氏女幾許字某今合葬於某原時乾隆十一年某

月日也。銘曰。

樹功於國而人嫉之。修孝於家而天忌之。天與人不可知。嗚呼。其官其年而止於斯。

只以鎖遠敗賊一節與提督哈校勘公之生平便足不朽。銘詞含蓄似昌黎。

○ 爲學一首示子姪

天下事有難易乎。爲之則難者亦易矣。不爲則易者亦難矣。人之爲學有難易乎。學之則難者亦易矣。不學則易者亦難矣。吾資之昏不逮人也。吾材之庸不逮人也。且且而學之久而不怠焉。迄乎成而亦不知其昏與庸也。吾資之聰倍人也。吾材之敏倍人也。屏棄而不用其與昏與庸無以異也。聖人之道卒於魯也。傳之然則昏庸聰敏之用豈有常哉。蜀之鄙有_{引何妙}二僧。其一貧其一富。貧者語於富者曰。吾欲之南海。何如。富者曰。子何恃而往。曰。吾一瓶一鉢足矣。富者曰。吾數年來欲買舟而下。猶未能也。子何恃而往。越明

年○貧○者○自○南○海○還○以○告○富○者○富○者○有○慚○色○西○蜀○之○去○南○海○不○知○幾○
千○里○也○僧○之○富○者○不○能○至○而○貧○者○至○之○人○之○立○志○顧○不○如○蜀○鄙○之○
僧○哉○是○故○聰○與○敏○可○恃○而○不○可○恃○也○自○恃○其○聰○與○敏○而○不○學○者○自○
敗○者○也○昏○與○庸○可○限○而○不○可○限○也○不○自○恨○其○昏○與○庸○而○力○學○不○倦○
者○自○力○者○也○

最足醒人妙不詞費

蜀碧後序

蜀碧者哭蜀也。哭蜀者所以著楊嗣昌之罪而憫邵捷春之愚以弔忠魂烈魄於地下也。蜀之險甲天下，扼其要塞，雖百萬可立挫焉。是以獻賊一寇，襲門而秦良玉困之，向非賂陳奇瑜脫去，則賊之亾久矣。嗣昌委賊於蜀，夫人知之而捷春不知也。撤夔萬之藩籬，守重慶之門戶，使賊得以出入縱橫而無所忌，此其罪在誰哉？故曰哭蜀者，所以著楊嗣昌之罪而憫邵捷春之愚也。獻賊之三入蜀也，分道屠戮，流血成川，蜀之慘極矣。當是時，自縊紳以至氓庶盡節者不可勝數，而閩中婦女或閉戶自焚，罵賊以死者無算。

戎馬倥傯。其事不必盡傳。傳者莫由表述。筆之於書。使後之君子
得以考之。則死者可以無憾。曩尙論其大略。特未暇詳。今吾弟磬
泉採擇成編。題曰蜀碧。是固余之志也。嗚呼。蜀非有深怨積怒於
賊也。而殘忍若此。天實爲之耶。抑人事使然耶。覽是集者。必將有
歎息泣下而不能已者。故曰蜀碧者。哭蜀也。

詞旨森嚴。筆力老潔。

雜說二

臨卽人張本元者。先世務耕。不聞以醫傳。忽自許能醫。善針人。莫知所授。不敢試。技無所效。於是時人爲之諺曰。僞大夫張本元。會余戚張氏婦艱於產。數日。舉家惶怖。不知所爲。本元至。命取婦褻衣一履。一以箕加其上。口吐針鍼之。囑曰。產時頂上有針孔。須泥以飯。張佯應之。俄而生子。視頂上果然。急如囑。張驚且喜。始知其能。先伯父楚錫公苦癰疾。請鍼之。本元曰。鍼其腓。先伯父戲之曰。吾病在首。而子鍼其腓。可乎。本元亦戲之。針甫半。忽折。徐鍼其踵。呼曰。出針。躍然出。達於梁。又爲人治癆疾。針其脊。終身無恙。自此

名漸著聞者爭造其門所試輒效與之錢不辭不與亦不責報於是時人復爲之諺曰神鍼張本元其針長或尺或數寸約計七十餘用則取諸口中言笑飲食率如常不覺也無子一女針法傳於女女死遂不傳彭子曰莊周云技也而進於道其本元之謂歟世所傳針法多矣亾若元之奇者或曰當明之亂元嘗避兵山中有老猿授此技其信然歟惜也其不傳已

絕世奇技絕世奇文